



**Operasaun Krime Organizadu
iha Fronteira Internasional entre Timor-Leste ho Indonézia**

Mahein Nia Lian Nú. 118, 27 Janeiru 2017



Foto: timoragora.blogspot.com

Fundasaun Mahein (FM)

Website: www.fundasaunmahein.org

2017



Kontiudu sira

Kontiudu sira	2
Introdusaun	3
Metodolojia	4
Negosiu ho kreditu ilegal	4
Viaturas ilegal	10
Rekomendasauun	12
Bibliogorafia	13



Introdusaun

Iha tinan 2010 relatóriou Fundasaun Mahein (FM) identifika ona kanal ka odamatan iha fronteira Repúblika Indonézia (RI) no Repúblika Demokratika Timor-Leste (RDTL) nian ne'ebé utiliza husi grupu krime organizadu hodi tama-sai liu husi aereo, terestre no maritima. Portantu grupu krime organizadu haree katak kanal sira ne'e fasil liu tama-sai, tamba kontrolu husi autoridade seguransa sei fraku, menus ba ekipamentu no facilidade sira hodi kontrola no dektektá.¹ Problema ida ne'e FM rekomenda ona katak parte rua RI-RDTL presiza jestau no kontrolu fronteristiku ida ne'ebé rigorozu liu-liu kanal ka odamatan sira ne'ebé risku ba atividade illegal sira no husi grupu krime organizadu.

Aleinde husi atividade krime organizadu, identifika mos motivu sira hodi hakat fronteira ilegal husi komunidade rai rua iha iha fronteira. Liu-liu motivu familiar no kultural, dalaruma ignora tiha prosesu sira hodi hakat fronteira tuir dalan legal. Tamba sira konsidera ne'e dalan ne'ebé fasil no lalais iha situasaun emerjensia ruma hanesan lia-mate no pratika kultural sira. Wainhira motivu familiar no kultural fasilita husi autoridade seguransa parte rua nian, dalaruma komunidade balu utiliza mos momentu sira ne'e hodi halo mos atividade komersiu tama sai ilegalmente.²

Fila fali ba atividade krime organizadu hakat fronteira RI – RDTL nian. Iha tinan lima ikus ne'e monitorizasaun Fundasaun Mahein (FM) nian identifika katak fronteira RI – RDTL kontinua iha lakunas seguransa no utiliza husi grupu krime organizadu sira hodi tama-sai. Relatóriou ikus liu husi FM iha tinan 2016 kona-bá trafiku umanu ka trafiku ba ema iha ne'ebé suspeitu involve husi sidadaun Indonézia ida no ida seluk husi husi sidadaun Timor-Leste, nomos vitima sira husi sidadaun Timor-Leste nian. Identifika katak sira nia movimentu hakat fronteira RI - RDTL via fronteira terrestre.³

Nune'e mos relatóriou husi media lokal Indonézia nian ne'ebé sai polêmika boot iha Timor-Leste iha tinan lima ikus ne'e no ho akuzasaun katak Timor-Leste sai hanesan fatin *transit* ba drogra husi rede krime transnasional sira no nia distinasaun ba Indonézia liu husi fronteira terrestre RI – RDTL. Nune'e mos iha tinan klaran tinan 2016 kona-bá deskonfia kontentor rua ne'ebé lakon iha Portu Dili. Iha ne'ebé kontentor rua ne'e deskonfia kilat iha laran no kilat hirak ne'e hodi suporta atividade Organisasi Papua Merdeka (OPM) no Komunismu iha Indonézia no observador balu husi Indonézia fo alarma ba autoridade seguransa Indonézia nian katak tenke

¹ Relatóriou Fundasaun Mahein (2010). Operasaun Krime Organizadu iha Timor-Leste. Dili. Disponivel iha: http://www.fundasaunmahein.org/wp-content/uploads/2010/11/mahein_nia_lian_no14_101110indonesia.pdf

² Relatóriou Fundasaun Mahein (2013). Jestau Fronteira no Kontrolu Migratori. Dili. Disponivel iha: http://www.fundasaunmahein.org/wp-content/uploads/2013/02/MNH_no-03_13022013Tetun.pdf..pdf

³ Relatóriou Fundadaun Mahein (2016). Trafiku Umanu iha Timor-Leste. Dili. Disponivel iha: <http://www.fundasaunmahein.org/wp-content/uploads/2016/08/MNL-116-Trafiku-Umanu-Final-1.pdf>



kuidatu no haforsa seguransa iha fronteira RI – RDTL.⁴ Maske notisia ne'e rasik lalos maibe julga ona katak seguransa iha fronteira RI – RDTL risku maka'as ba atividade kontrabandu.

Atividade kontrabandu iha fronteira RI – RDTL fila fali sai atensaun husi FM iha inisiu tinan 2017. Iha ne'ebé monitorizasaun FM nian iha tinan rohan 2016 identifika katak fronteira RI – RDTL kontinua iha lakunas seguransa no aproveita husi grupu krime organizadu sira. Nune'e relatório ida ne'e nia âmbitu diskusaun kona-bá negosiu no kreditu illegal no viaturas sira illegal hakat fronteira internasional entre RI – RDTL.

Metodolojia

Metodu ne'ebé adopta iha relatório liu husi monitorizasaun iha media nasional no internasional durante periodu tinan 2012 to'o 2016 kona-bá atividade krime krime transnasional ne'ebé hakat fronteira RI-RDTL nian. FM halo mos observasaun direita iha terenu durante periodu sira ne'e hodi identifika lalaok no forma sira husi krime transnasional nian hakat fronteira RI-RDTL nian.

Depois ramata prosesu sira iha leten ne'e hodi konklui relatório ida ne'e liu husi metodu ne'ebé FM adopta maka *Security Sector Discussion* (SSD). SSD hanesan metodu diskusaun ida ne'ebé involve peskizador sira husi FM rasik hodi halo diskusaun no análise ba dadus ne'ebé rekolla no hamosu rekomendasaun prinsipal sira.

Negosiu ho kreditu ilegal

Iha tinan rohan 2016 monitorizasaun FM nian iha Munisipiu Covalilma kona-bá operasaun krime organizadu ne'ebé involve suspeitu ho sidadaun Atambua – Indonézia no Covalima - Timor-Leste. Tipu husi krime organizadu ne'e ho forma fo kreditu sasan ba cliente sira ne'ebé hakarak simu kreditu sasan hodi loke loja ka kios. Maibe antes simu kreditu refere tenke sai uluk membru ho nia kriteria tenke hatama uluk osan administrasaun nian. Iha ne'ebé, ema ne'ebé fo kreditu mai ho kompañia ne'ebé nia baze sentral iha Atambua – Indonézia ho naran COMPANHIA MITRATIN GROUP, Lda lidera husi sidadaun Indonézia ida (Timor-oan ne'ebé uluk refuijadu iha Atambua) hanesan komisariu ba kompañia no nia ramu iha Timor-Leste nia baze iha Dili lidera husi sidadaun Timor-oan ida hanesan Jestor Programa no nia cliente sira iha munisipiu sira hanesan Ainaro, Bobonaro no Covalima. Hodi hala'o kompañia nia atividade fo kreditu ba cliente sira, kompañia refere rekruta mos ninia funzionariu sira hodi buka nia cliente. Maske nune'e, FM identifika katak kompañia refere la iha lisensa ba atividade nian ka kompañia ilegal hodi lohi ema sira ne'ebé hakarak simu kreditu nune'e hetan lukru husi atividade refere.

⁴ Replita Online, Maiu 2016. Disponivel iha: <http://www.repelita.com/indonesia-perlu-kewaspadaan-adanya-dua-contener-senjata-hilang-dipelabuhan-dili-timor-leste/>



1. Kompañia ne'ebé atu fo kreditu (kompania ilegal)

Naran Kompania	: COMPANHIA: MITRATIN GROUP, Lda.
Komisariu ba Kompania	: Armando Ximenes (Indonézia)
Jestor Programa	: Mariana Gusmão (Timor-Leste)
Númeru Kontaktu	: 77313810/76123730
Baze Sentral	: Atambua – Indonézia
Ramu Iha Timor-Leste	: Surikmas, Dili, Timor-Leste

Tuir funzionari sira ne'ebé rekruta husi kompañia refere (ne'ebé hanesan mos vitima ba kompañia ne'e nian) hato'o katak antes ne'e kompañia ne'e naran COMPANHIA: MITRATINDO GROUP Lda depois muda kompania ne'e nia naran ba COMPANHIA: MITRATIN GROUP Lda.

Komisariu ba Kompania Armando Ximenes sidadaun Indonézia hela iha Atambua (Timor-oan ne'ebe uluk refuijadu ba Atambua iha tinan 1999) mak lidera kompañia refere no hanesan mos responsável maximu iha baze sentral kompania nian iha Atambua – Indonézia. Jestor Programa Mariana Gusmão sidadaun Timor-Leste husi Lohorai, Suai, Munisipiu Covalima hanesan responsável masimu ba ramu kompañia nian iha Timor-Leste no nia baze iha Surikmas, Dili. Mariana Gusmao maka halo rekrutamentu ba funzionari sira hodi buka cliente iha munisipiu Ainaro, Bobonaro no Covalima, deskonfia mos katak cliente sira sei iha munisipiu sira seluk.

Husi dadus ne'ebe vitima sira hato'o ba FM katak funzionari husi COMPANHIA: MITRATIN GROUP Lda husi Dili rekruta ninia funzionari iha Covalima hodi buka cliente sira ne'ebé hakarak simu kreditu sasan ba negosiu nian hanesan:

- a) Cliente ba simu kreditu sasan nesesdade báziku nian
- b) Cliente ba simu kreditu sasan otomotif nian
- c) Cliente ba simu kreditu sasan konstrusau

Kompania refere fo kreditu sasan (*kredit dalam bentuk barang*) maibe antes hetan kreditu refere tenke sai uluk membru ba kompañia ho nia kriteriu tenke hatama osan US\$ 50.00 nu'udar osan administrasaun nian (*resivu osan administrasaun nian no bukti regis anggota untuk menjadi anggota sub-distributor haree aneksu*). Nune'e wainhira hetan ka simu tiha kreditu refere hodi halo negosiu, ema ne'ebe simu kreditu sei selu *cicilan* ba kompañia ne'ebé fo kreditu.



Resivu osan administrasaun nian husi COMPANHIA: MITRATIN GROUP Lda

No. 013
Telah terima dari Quintino Gusmão
Uang sejumlah (lima puluh dollar)
Untuk pembayaran Administrasi

✓ memberi
Quintino Gusmão
Rp. \$ 50.00 #

31/05/2016
✓ menerima
Felix Moniz Amaral

Formulariu rejistru ba membru ka evidensia rejistru hanesan membru COMPANHIA:
MITRATIN GROUP Lda

COMPANHIA : MITRATINDO GROUP Lda

BUKTI REGIS ANGGOTA UNTUK MENJADI ANGGOTA SUB DISTRIBUTOR

Nama	: <u>Quintino Gusmão</u>
No.KTP	: <u>0276010</u>
Alamat	: <u>Tobaco foot</u>
No. Telp	: <u>75732120</u>
Pekerjaan	: <u>Professor / Guru</u>
Anggota Mitra Untuk Usaha :	<u>Sembako</u>
Jumlah Modal Investasi \$: <u>1005.75</u>

Data 31 / 05 / 2016

Diregis Oleh Felix Moniz Amaral Calon Anggota Quintino Gusmão
Ketua Paket Felix Moniz Amaral Anggota Quintino Gusmão

Antes simu simu sasan husi kompañia, ema ne'ebé simu kreditu hato'o uluk ninia proposta ka lista ba sasan sira ne'ebé atu hetan kreditu. Depois kompañia refere hatama sasan husi Atambua – Indonézia hodi entrega ba nia cliente sira. Tuir vitima



sira katak buat sira ne'e hotu la akontese, ikus mai kompania ne'e nia Jestor Programa Mariana Gusmão lori halai tiha ami nia osan administrasaun nian no kreditu ne'ebé sira atu fo mos la iha.

2. Funzionari kompaňia nian no kliente sira (vitima)

Tuir funzionari sira (hanesan mos vitima) katak cliente (vitima) ne'ebé sai ona membru atu simu kreditu husi kompaňia mais-menus lima nolu-resin (50-resin), sira lahatene lolos númeru husi cliente sira tamba dokumentu hotu-hotu iha Jestor Programa Mariana Gusmão nia liman. FM identifika katak funzionari ne'ebé rekruta husi COMPANHIA: MITRATIN GROUP Lda iha Munisipiu Covalima nian maka tuir mai ne'e:

- a) Felix Moniz Amaral
- b) Elvira Pereira
- c) Gaspar
- d) Mariano
- e) Bonifacio
- f) Rui
- g) Natalino
- h) Tome do Rosario (*hanesan TIM SUKSES ba KOMPANHIA: MITRATIN GROUP Lda nian maibe nia la iha kontratu servisu ruma ka la asina kontratu servisu husi kompaňia*).

Tuir funzionari sira ne'ebé FM hasoru hato'o katak sira hotu hanesan vitima tamba kompaňia refere selu sira nia salariu la kompletu, balu selu kompletu no balu la selu total. Sira na'in hitu (7) asina kontratu servisu hanesan STAFF LAPANGAN iha fulan Maiu 2016 durante fulan tolu (3) hanesan faze provotoriu to'o fulan Agustu 2016 maibe kompaňia refere selu deit sira nia salariu fulan ida [1] nian ho salariu US\$ 115.00. Entre funzionari na'in hitu (7), na'in rua (2) simu salariu lakompletu US\$ 100.00, na'in tolu (3) simu kompletu US\$ 115.00 no na'in rua (2) la simu total ka laselu.

Fuzionari ka vitima sira mos hato'o katak wainhira asina kontratu Jestor Programa kompaňia nian la fo kopja kontratu ba sira. Funzionari sira simu deit ID Card hodi halo halo servisu. Funzionari balu ne'ebé FM hasoru ninia ID Card haree iha kraik ne'e.

ID Card Funzionari COMPANHIA MITRATIN GROUP Lda



Nune'e mos durante sira servisu hamutuk, funzionari sira husu kona-bá kompañia nia ezistensia no nia lisensa atividade, Jestor Programa Mariana Gusmão responde "lisensa neneik ita sei halo no imi halo deit imi nia servisu nomos ida ne'e la'os buat importante ida". Funzionari sira husu ba Jestor Programa Mariana Gusmão atu hasoru malu mos ho Komisariu Armando Ximenes maibe responde katak "ema boot hanesan komisariu la naran funzionari sira ba hasoru tamba nia servisu barak atu halo".

Fuzionari sira mos (vitima) hato'o katak wainhira sira servisu kuandu loron ida la hetan cliente ruma, Jestor Programa Mariana Gusmão sempre hakilar no ameasa atu hasai sira tumba lahetan cliente. Nomos Jestor Programa Mariana Gusmão husu ba funzionari sira semana ida tenke ema hetan ema na'in rua nolu-resin lima (25). Maibe pratikamente sira lahetan cliente sira hanesan ne'e kada semana. Ikus mai Jestor Programa Mariana Gusmão lori halai cliente sira nia osan, no to'o agora sira lahatene nia paradeiru lolos.

Fuzionari (vitima sira mos) kompañia nian hato'o katak durante sira servisu hamutuk ne'e Jestor Programa Mariana Gusmão, Armando Ximenes hamutuk ho sidadaun Indonézia na'in tolu (3) Yano, Fridus no Edy hatama sasan nesessidade báziku kareta tronton ida nakonu ho kareta kiik ida mai Timor-Leste ilegalmente liu husi fronteira Mota-Masin - Covalima hodi fa'an iha Timor-Leste. Fuzionari sira konfirma ho sidadaun Indonézia na'in tolu (3) ne'e nia lisensa ka dokumentu sira hodi hatama sasan nian maibe sira responde katak dokumentu sira ne'e la iha no sei trata iha Atambua – Indonézia.

3. Problema ne’ebé identifika

Husi dadus iha leten ne’e, FM identifika katak:

- a) Kompania ilegal ka falsu hodi bosok ema sira ne’ebé iha osan ka negosianta sira ka ema ne’ebé simu kreditu hodi hetan lukru ho forma sira bosok.
- b) Armando Ximenes (Indonézia) no Mariana Gusmão (Timor-Leste) maka utiliza kompañia refere hodi hetan lukru ho dalan ne’ebé bosok.
- c) Funzionariu kompañia nian hanesan mos vitima tamba Armando Ximenes no Mariana Gusmão utiliza sira hodi hetan lukru liu husi dalan rekrutamentu no buka cliente ne’ebé hakarak simu kreditu.
- d) Lukru ne’ebé Armando Ximenes (Indonézia) no Mariana Gusmão (Timor-Leste) hetan maka osan administrasaun nian hanesan rekezitu hodi sai membru ho total osan kada cliente ida hodi sai membru hamutuk US\$ 50.00.
- e) Deskonfia sei iha tan vitima seluk husi Armando Ximenes no Mariana Gusmão nia bosok liu husi maneira sira atu fo kreditu sasan nian.
- f) Vitima ka cliente sira entrega ona osan ba Jestor Programa Mariana Gusmão ho total osan kada cliente US\$ 50.00.
- g) Mariana Gusmão ne’ebé hela iha Dili to’o agora subar husi vitima sira (cliente) nomos ninia funzionariu sira (hanesan mos vitima).
- h) Funzionariu sira (hanesan mos vitima) to’o agora kontinua moris iha tauk nia laran tamba hetan ameasa husi cliente sira ne’ebé atu simu kreditu (vitima) tamba ezekuta kompañia nia servisu hodi buka cliente sira maibe cliente sira ne’ebé sai ona membru (hatama osan administrasaun nian US\$ 50.00) maibe sira nia osan lakon no kreditu ne’ebé sira promete la akontese ka la fo no osan Mariana Gusmão lori halai tiha ne’ebé to’o agora sira hotu la hatene nia paradeiru.
- i) Tuir funzionariu sira (ne’ebé hanesan mos vitima) hato’o katak cliente sira mais-menus ema lima nolu-resin (50-resin) husi Munisipiu Covalima nian ne’ebé sai ona membru atu hetan kreditu husi kompania refere.
- j) Deskonfia sei iha tan vitima seluk husi Munisipiu Ainaro, Bobonaro no munisipiu sira seluk. Tamba tuir funzionariu sira (vitima mos) hatete katak Mariana Gusmão hato’o ba sira katak sira nia cliente iha munisipiu seluk mos.
- k) Uma ne’ebé kompañia aluga iha Suai – Covalima to’o agora kompañia refere seidauk selu no uma na’in kontinua ezize ba funzionariu (vitima) kompañia nian.
- l) Tuir funzionariu (vitima) sira hato’o katak Armando Ximenes no Mariana Gusmão hamutuk ho sidadaun Indonézia na’in tolu (3) Yano, Fridus, Edy iha fulan Fevereiro 2016 hatama uluk ona sasan balu iha kareta tronton ida no kareta kiik ida mai Timor-Leste ilegalmente liu-husi fronteira Mota-Masin – Covalima. Funzionariu (vitima) sira mos deskonfia katak kareta no sasan sira ne’ebé tama ilegal liu husi fronteira RI – RDTL fasilita husi pesoal balu Tentara Nasional Indonesia (TNI), Polisi Republik Indonesia (POLRI), Beacukai - Indonézia ho pesoal balu husi Unidade Patrullamentu Fronteira (UPF) – Policia Nacional Timor-Leste (PNTL) no Alfândega Timor-Leste nian.



Viaturas ilegal

Tuir relatóriu media lokal Indonézia nian fo sai iha tinan 2016 katak desde tinan 2000 to'o 2016 viaturas ilegal hanesan kareta no motor hamutuk 6000 husi Indonézia tama ilegalmente iha Timor-Leste.⁵ Husi total viaturas hirak ne'e, maioria tama liu husi dalam legal ka odamatam securansa no fasilita husi autoridade securansa sira iha fronteira.⁶ Rezultadu monitorizasaun FM identifika viaturas sira ne'e naok husi grupu krime organizadu sira iha Indonézia husi kareta *rental* ka kareta sira ne'ebé fo aluga iha Java no hatama liu husi Provinsia Nusa Tenggara Timur (NTT) – Indonézia mai iha Timor-Leste liu husi fronteira terrestre RI - RDTL.

1. Grupu krime organizadu nia sentru, rede no maneira servisu

Hanesan fo sai ona husi relatóriu media lokal Indonézia nian katak viatura sira ne'e balu nu'udar rezultadu husi atividade naok husi grupu krime organizadu no suspeitu husi kazu ida ne'e balu konsege kaptura husi autoridade securansa Indonézia nian wainhira sira tenta lori sai kareta husi Java mai iha Kupang NTT – Indonézia no barak konsege hakat fronteira RI – RDTL.

FM identifika forma seluk husi atividade grupu krime organizadu nian la'os deit naok maibe ho maneira seluk ho kreditu ba *dealer* ka fa'an na'in sira iha Java – Indonézia. FM identifika katak rede krime organizadu nia sentru iha Jogjakarta no Kupang – Indonézia. Autor sira husi krime organizadu iha ninia ezekutador iha kampu ka terenu hodi ezekuta.

Forma ida ne'e grupu krime organizadu sira ba dahuluk harii kompañia ho dokumentu kompletu (falsu) hodi halo pedidu kreditu ba *dealer* ka fa'an na'in sira no sira mos iha edifisiu rasik (aluga komunidade nia uma) no kompletu ho servisu administrasaun nian husi kompañia refere (kompañia falsu). Hafoin hato'o sira nia pedidu kreditu nian, *dealer* ka fa'an na'in sira halo mos inspesaun ba sira nia edifisiu hodi konfirma lolos ezistensia kompañia nian no verifika dokumentu no atividade kompañia nian.

Prosesu sira ne'e ramata *dealer* ka fa'an na'in fo ona kreditu ba kompañia ne'ebé hato'o pedidu kreditu kareta nian. Bainhira kompañia ne'ebé simu kreditu hetan ona kareta refere iha loron ne'e kedas kareta ne'ebé kompañia kreditu transfere ba Indonézia Leste Kupang – NTT liu husi nia ezekutor kampu sira. Nune'e mos bainhira kareta sira ne'e transfere, kompañia ne'ebé halo kreditu mos sees ona husi fatin ne'ebé sira nia kompañia hela ba. To'o tempu ne'ebé *dealer* ka fa'an na'in sira ba konfirma fila fali hodi selu selu kreditu ne'ebé kompañia halo, kompañia refere la iha ona fatin no kareta mos lakon ona.

⁵ 6000 Kendaraan dari Indonesia Masuk Secara Ilegal ke Timor Leste. Loron 23 Julu 2016. Disponivel iha: <http://news.okezone.com/read/2016/07/23/340/1444944/6-000-kendaraan-dari-indonesia-masuk-secara-illegal-ke-timor-leste>

⁶ MetroTv, 13 November 2014. Penyuluduan 6000 mobil illegal dari Indonesia ke Timor-Leste: disponivel iha: <https://www.youtube.com/watch?v=XQs7gtqiYM4>



Bainhira kareta no motor sira husi Java to'o iha Kupang – NTT no iha ezekutador seluk iha Kupang nunka hasoru malu no kuinese maluk ezekutor seluk husi Java no sira kontaktu malu liu husi telemovel deit. Nune'e husi Kupang lori liu mai Atambua no hakat fronteira iha tempu kalan bainhira odamatan fronteira RI – RDTL taka tiha ona. Husi dadus ne'ebé FM hetan rede krime organizadu nian involve mos husi autoridade seguransa fronteira RI – RDTL. Nune'e viaturas hirak ne'e fasilita husi autoridade seguransa fronteira RI - RDTL nian no selu sira ho valor orsamentu entre Rupiah (Rp) Juta 5 to'o 20. Depois autoridade seguransa fronteira Indonézia nian entrega ba sosa na'in sira husi Timor-Leste ne'ebé hein ona iha fronteira parte RI – RDTL nian, Mota-Ain.⁷

2. Paradeiru viaturas sira nian iha ne'ebé?

Relatório media lokal Indonézia fo sai katak kareta sira ne'ebé naok husi grupu krime organizadu identifika ho tipu Avanza no Xenia no distinasau ikus liu maka iha Dili – Timor-Leste. Hafoin viaturas sira ne'e to'o iha Dili, fa'an na'an sira sira fa'an fila fali ba públiku. Identifika mos katak viaturas sira hanesan kareta ho marka Avanza no Xenia nia folin entre US\$ 7,500.00 to'o 12,000.00 no nia sapa matrikula troka ona ba sapa matrikula Timor-Leste nian.⁸

Tuir autoridade Polisia Timor-Leste nian, PNTL rekuiñese viaturas sira ne'ebé naok husi grupu krime organizadu sira hatama ilegalmente mai iha Timor-Leste. Nune'e husi kareta hirak ne'ebé fa'an mai iha Timor-Leste no ida konsege autoridade seguransa Indonézia nian kaptura fila fali bainhira tama ba area Atambua – Indonézia iha tinan 2016 husi ema ne'ebé sosa kareta sira ne'e.⁹

Iha diskusaun balu entre FM ho autoridade seguransa Timor-Leste iha tinan 2016 kona-bá viaturas illegal ne'ebé hakat fronteira RI – RDTL katak PNTL iha ona koordenasaun ho POLRI hodi kombate atividade kontrabandu iha fronteira RI – RDTL. Maibe susar identifika lolos paradeiru viaturas hirak ne'e nian maske ita hatene katak viaturas iha ne'e dadaun ne'e iha Timor-Leste.

Tuir fontes FM nian hato'o katak kareta hirak ne'ebé husi atividade kontrabandu iha fronteira RI – RDTL la'os deit sosa husi pesoal balu maibe involve mos grupu boot sira husi ema ne'ebé iha poder. Hanesafo sai ona husi relatório media lokal Indonézia nian katak kareta hirak hatama iha tempu kalan bainhira odamatan seguransa taka ona no tama liu husi odamatan legal fronteira RI – RDTL, Mota-Ain. Signifika katak autoridade seguransa RI – RDTL iha kuiñesementu ba movimentu ne'e nian no la'os ona segredu katak autoridade seguransa sira maka fasilita.

⁷ MetroTv, 13 November 2014. Penyuludunan 6000 mobil illegal dari Indonesia ke Timor-Leste: disponivel iha: <https://www.youtube.com/watch?v=XQs7gtqiYM4>

⁸ MetroTv, 13 November 2014. Penyuludunan 6000 mobil illegal dari Indonesia ke Timor-Leste: disponivel iha: <https://www.youtube.com/watch?v=XQs7gtqiYM4>

⁹ Komandante PNTL Departamentu Tranzitu no Seguransa Rodoviaria Nasional hato'o iha diskusaun ne'ebé organiza husi Diresaun Nasional Seguransa Rodoviaria – Ministériu Interior. Dili, Janeiru 2017.



Aleinde fasilita husi autoridade seguransa iha fronteira, sosa na'in sira husi Timor-Leste involve mos "grupu boot seluk" hodi hetan fundu ba interese seluk mos. No ida ne'e PNTL presiza buka tuir paradeiru kareta hirak ne'e nian, liu-liu kareta sira ho marka Avanza no Xenia ninia paradeiru agora iha ne'ebé? Husi ne'e bele identifika ona grupu boot ne'ebé hanesan sosa na'in ba kareta ilegal sira ne'ebé hakat fronteira RI – RDTL ne'ebé dadaun ne'e kareta hirak ne'e nia sapa matrikula troka ona ba Timor-Leste nian. Nune'e mekanismu sira hodi identifika aleinde liu husi Diresaun Nasional Transporte Terreste (DNTT) Ministériu Obras Públika, Transporte no Komunikasaun (MOPTK) nian no importante mos verifika iha Diresaun Nasional Patrimoniu Estadu – Ministériu Finansa nian hodi konfirma katak kareta sira ho marka Avanza ho Xenia tama duni iha pakote ne'ebé Governu Timor-Leste sosa no dadaun hakerek iha lolon "Kareta Estadu" nian.

Nune'e mos medida kontinuasaun husi parte rua autoridade seguransa RI – RDTL nian hodi kombate krime transnasional ne'ebé hakat fronteira kontinua hametin koordenasaun no kooperasaun hanesan parte ida husi implementasaun ba Nota Intendementu (*Memorandum of Understanding*) ne'ebé POLRI no PNTL asina ona iha tinan 2009 no MoU sira tuir mai hodi halo monitorizasaun, prevene no kombate krime transnasional sira hakat fronteira RI – RDTL nian.¹⁰

Rekomendasaun

1. Rekomenda autoridade seguransa RI – RDTL presiza haforsa koordenasaun no kooperasaun iha âmbitu jestaun no kontrolu fronteristiku nian iha fronteira terrestre RI – RDTL.
2. Autoridade seguransa Timor-Lese hodi kontinua halo investigasaun kle'an liu tan ba kazu sira ne'ebé deskreve iha leten ba krime sira hakat fronteira RI – RDTL husi grupu krime organizadu sira.

¹⁰ Memorandum Of Understanding Between The Indonesian National Police and The National Police of The Democratic Republic of Timor-Leste On Cooperation in Preventing and Combating Transnational Crime and Development Police Collaboration, 29 July 2009



Bibliografia

Begini Cara Penyelundupan Mobil & Motor Ke Negara Timor Leste. Dipublikasikan tanggal 25 Des 2015. Disponivel iha:

<https://www.youtube.com/watch?v=lcHgiTrSwyk>

Memorandum Of Understanding Between The Indonesian National Police and The National Police of The Democratic Republic of Timor-Leste On Cooperation in Preventing and Combating Transnational Crime and Development Police Collaboration.

MetroTv, 13 November 2014. Penyuludupan 6000 mobil illegal dari Indonesia ke Timor-Leste: disponivel iha: <https://www.youtube.com/watch?v=XQs7gtqiYM4>

Polda Metro Jaya mengungkap penyelundupan belasan kendaraan bermotor ilegal dari Indonesia menuju Dili, Timor Leste. Dipublikasikan tanggal 28 Mar 2016. Disponivel iha: <https://www.youtube.com/watch?v=JcAQFNYE27c>

Relatório Fundadaun Mahein (2016). Trafiku Umanu iha Timor-Leste. Dili. Disponivel iha: <http://www.fundasaunmahein.org/wp-content/uploads/2016/08/MNL-116-Trafiku-Umanu-Final-1.pdf>

Relatório Fundasaun Mahein (2010). Operasaun Krime Organizadu iha Timor-Leste. Dili. Disponivel iha: http://www.fundasaunmahein.org/wp-content/uploads/2010/11/mahein_nia_lian_no14_101110indonesia.pdf

Relatório Fundasaun Mahein (2013). Jestau Fronteira no Kontrolu Migratoriu. Dili. Disponivel iha: http://www.fundasaunmahein.org/wp-content/uploads/2013/02/MNH_no-03_13022013Tetun.pdf..pdf

Replita Online, Maiu 2016. Disponivel iha: <http://www.repelita.com/indonesia-perlu-kewaspadaan-adanya-dua-contener-senjata-hilang-dipelabuhan-dili-timor-leste/>